

**ՀՆԴԿԱՀԱՅՈՑ ՀՈԳԵՎՈՐ ՀՈՎԻՎ Տ. ՕՇԱԿԱՆ ՎՐԴ.
ԳՅՈՒԼԳՅՈՒԼՅԱՆՆ ԱՄԵՆԱՅՆ ՀԱՅՈՑ ՀԱՅՐԱՊԵՏՈՒԹ-
ՅԱՆ ԱՆՈՒՆԻՑ ՄԱՍՆԱԿՑԵՑ ՀՆԴԻԿ ՄԱԼԱԲԱՐ ԵԿԵՂԵ-
ՑՈՒ ԳԱՀԱԿԱԼ ՆՈՐԻՆ ՍՐԲՈՒԹՅՈՒՆ ԲԱՍԻԼԻՈՍ ՄԱՐ
ԹՈՄԱ ՄԱՏԹԵՈՍ Բ-Ի ՀՈՒՂԱՐԿԱՎՈՐՈՒԹՅԱՆԸ**

Հունվարի 28-ին հնդկահայոց հոգևոր հովիվ Տ. Օշական վրդ. Գյուլգյուլյանը Ն.Ս.Օ.Տ.Տ. Գաբեզին Բ Ամենայն Հայոց Կաթողիկոսի անունից Քերալայի Քոլլամ քաղաքի մատռան մեջ մասնակցեց Հնդիկ Ուղղափառ Եկեղեցու գահակալ Նորին Սրբություն Բասիլիոս Մար Թոմա Մատթեոս Բ-ի հուղարկավորությանը:

Արարողության ընթացքում դամբանական խոսեց նորընտիր գահակալ Նորին Սրբություն Բասիլիոս Մար Թոմա Դիդիմոս Ա-ն՝ անդրադառնալով հանգուցյալ Հայրապետի աստվածահաճո գործունեությանը՝ հորդորելով ամենքին աղոթելու Նրա հոգու հանգըստության և խաղաղության համար: Այնուհետև հանուն Ամենայն Հայոց Կաթողիկոսի արարողությանը ցավակցական խոսք ասաց Տ. Օշական վրդ. Գյուլգյուլյանը:

«Որպես Ն.Ս.Օ.Տ.Տ. Գաբեզին Բ Ամենայն Հայոց Կաթողիկոսի ներկայացուցիչ՝ այստեղ ենք, Ձեր կողքին՝ բերելով Ամենայն Հայոց Հայրապետի և բոլոր հայ քրիստոնյաների վշտակցությունը: Ջերմությամբ ենք մտաբերում հայ ժողովրդի համար նշանակալից 2001 թվականը, երբ Հայաստանում քրիստոնեությունը որպես պետական կրոն հռչակման 1700-ամյակի առիթով հանգուցյալ Հայրապետն այցելեց Մայր Աթոռ Սուրբ Էջմիածին՝ Իր գորակցությունն ու սերը բերելով Հայ Առաքելական Եկեղեցուն և մեր Եկեղեցու հավատացյալներին: ...Ժողովրդի նկատմամբ հանգուցյալ Հայրապետի ջերմ սիրտ ակնհայտ վկայությունն են տասնյակ հազարավոր քրիստոնյա և ոչ քրիստոնյա այս հավատացյալները, ովքեր այսօր եկել են իրենց հարգանքի տուրքը մատուցելու Նրան: Աղոթքս է մեր Երկնավոր Հորը, որ Ամենակարող Աստված Իր երանելի հարկերից ներս ընդունի հանգուցյալ Հայրապետի արդար հոգին, իսկ Նրա եկեղեցասիրությունն ու անմնացորդ քրիստոնեական սերը միշտ ուղեկից լինեն մեզ», - նշեց Օշական վարդապետն իր խոսքում:

Այնուհետև ներկա բոլոր հոգևորականներն իրենց վերջին հրաժեշտը տվեցին՝ պատարագչի ամբողջական զգեստավորումով Ս. Թովմասի Աթոռին բազմած հանգուցյալ Հայրապետին, որից հետո Հայրապետի դին իջեցվեց մատռան բակում փորված գերեզմանի մեջ և հողի փոխարեն Նրա վրա լցվեց 1500 կգ խունկ:

Հունվարի 29-ին, սգահանդեսի ժամանակ, Օշական վարդապետն ընթերցեց Գաբեզին Բ Ամենայն Հայոց Կաթողիկոսի ցավակցական գիրը (տե՛ս էջ 20):

Հուղարկավորությանը մասնակցում էին քույր Եկեղեցիների ներկայացուցիչներ, Հնդկաստանի Հանրապետության Ազգային Ժողովի անդամներ, տեղական իշխանության ներկայացուցիչներ և հազարավոր հավատացյալներ:

*ՄԱՅՐ ԱԹՐԱՆ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*